



普吉島个一日

天官光，載緊兩三千人个油輪，晃激啊晃激，慢慢駛俚馬來西亞个普吉島，天烏海暗，像弓蕉樣个月光同船相隨，一座一座大大細細个山，浸在海个一片靚，看著咧，普吉島！矇緊烏紗个天地一點一點退撒紗巾，放出屬於日時頭个光線，山个該頭，天公用淦黃个柑色打扮該正擎開目个面頰卵，像棉花樣个白雲，係天公畜个魚陣，在厥面頭前洄來洄去，天甫甫光，大船斯恬恬停在外海，同該恬靜个普吉島遠遠對相。大明星出場哩啲，遠遠个山背，一粒大火球慢慢探出頭，在眾人个讚嘆聲中，佢風神喋喋金光四射，等到金色个絲線鋪平海面該下，天斯大光咧，普吉島也跔緊鬧鬧熱熱停動跔來哩啲。

一落船斯分在地人唆慫去捉筋骨，熟絡个手路扳筋又拗骨，硬鉸个圍身分師父打墊去硬硬會斷截，阿姆哀！賺皮疾，係自家討來个。一點鐘久个忍聲嚙齒，換來歸身个落滂，斯像對水竇出來共樣，唉罔唉，捉過後个鬆爽，還係會錫人過來報到。

越晝，海脣沙灘越鬧熱，做日光浴个外國人霸占撇一大片沙灘，各色各樣个洄身衫、細妹人个「比基尼」裝……，天頂个日頭看去面紅濟借，佢用盡大个熱情來招呼搞水个人客，用厥熱度燒度溫溫款待這兜同佢相親个人。藍色个海清清淨淨，鬥鬧熱个風，捲起一層一層像乳油樣个白色波浪，日頭已烈，毋過試著毋會熱，享受日頭光，分人有好心情。

沙灘頂个搞寮活動百百種，佢欣羨鵲婆在天頂迂迂飛个自在，夢想同海風遊寮个樂線，躑躑斯跔拖曳遮上天，哇，果然鬆爽！天青海藍，在耳公脣講細聲話个清風，輕輕撩弄頭那毛，佢係一隻鳥，掀開雙翼在天頂打迂飛，腳下个海，係藍色个絲絨，人个世界，在吾腳下變做另外一種景致，這下嘎同佢無相干咧，等到種落海竇該下，正又過轉魂到人間！普吉島，這搞寮个天堂，下次擺佢還想過來呢！

作者：劉玉蕉

☆詞彙學習☆

- | | |
|---|---------------------------------|
| 【晃激】gongˋ giebˋ：搖晃的樣子。 | 【唉罔唉】ai+ mongˊ ai+：叫歸叫。 |
| 【矇緊】miang+ ginˊ：以物輕輕蓋住。 | 【相親】siong+ cin+：親近。 |
| 【打墊】daˊ diabˋ：折磨，比喻按摩的動作。 | 【躑躑】ngongˋ damˊ：比喻沒搞清楚狀況即貿然做某事。 |
| 【賺皮疾】conˋ piˋ cidˋ：比喻自找苦吃。 | 【種落】zhungˋ logˋ：垂直落下。 |
| 【忍聲嚙齒】ngiun+ shang+ ngadˋ chiˊ：咬緊牙根，忍住不發出聲音 | |

☆文法學習☆

- 【去】kiˋ / ki+：大埔腔的「去」，除了當表示動作方向的趨向動詞、趨向補語之外，另可作為助詞使用，引介動作的程度或結果。如文中「打墊去硬硬會斷截」(整骨整得差點要斷掉)、「看去面紅濟借」(看起來臉紅通通的)。